

Date – 14/02/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Aizawl International Half Marathon chu tukin dar 6 leh a chanve khan Aizawl Mualpui Rajiv Gandhi Stadium atangin an tlan tan.
2. Serchhip District NGO Coordination Committee chuan Central sawrkar in India leh Myanmar ramri hung a tumna chu an thlawp tih an sawi.
3. Prime Minister Narendra Modia chuan a office thar Seva Teerth Complex, Delhi ami chu nizan khan a hawng.
4. Prime Minister Narendra Modia chuan a office thar Seva Teerth Complex a luah hnuah thutlukna pawimawh tak tak pali a siam nghal.

<><><>

INTNL HALF MARATHON

Aizawl International Half Marathon chu tukin dar 6 leh a chanve khan Aizawl Mualpui Rajiv Gandhi Stadium atangin an tlan tan a,

Marathon hi Larsap Gen Retd VK Singh, Sports Minister Pu Lalnghinglova Hmar, Health Minister Pi Lalrinpuii leh Official dang tawiawmtu ten an vailiam a ni.

Kan corr report lo ngaithla ang.

He intlansiaknaah hian mi 2500 vel tel theia rin a ni a, Aizawl International Half Marathon curator Captain Rahul Bali chuan Akashvani Aizawl zawhna chhangin, Aizawl International Half Marathon hi tlang rama tlan (hill marathon) a nih avangin marathon dangte aiin a danglam bik a ti a. Khawvel hmun hrang hrang atangin mi 2,500 chuang an rawn tel dawn thu leh nikuma Aizawl International Half Marathon vawi 1-naah khan mi 1,500 vel an tel a; tunah chuan a hma aiin a lian tawh zawk hle a, Kenya, Ethiopia, Bahrain, United Kingdom leh France ram atangte pawhin marathon-a tel tur an rawn kal a, hei hian Mizoram chu khawvel marathon lian huangah a hruai lut a ni, a ti.

Mizoramah rel a luh tawh avangin Mizorama rawn luh a awlsam tawh thu Captain Rahul Bali chuan a sawi a, hei hi he marathon hlawhtlinna chhan lian tak pakhat a ni a ti.

<><><>

CM

Chief Minister Pu Lalduhoma hovin a office-ah Thenzawl Peace City Master Plan siam mek chu nimin khan thlirho a ni.

Peace City huam chung kilometer sawmruk a zauah ram bial hrang hrang thliarin chung ram bial (zone) te hmanna tur ruahmannate chu an en a. Mihring

chenna tur bial te, sumdawna hmun tur te, zirna hmun tur te, Health Facility awmna hmun tur te, Green Park chin tur te leh Sports Complex hmun tur te a biala ruahman an ni a. Industrial Hub tur pawh riruan a ni bawk. Heng bial chhunga hmunhma dah turte dah dan tur (plan) hi ruahman zui leh tur a ni ang.

Master plan ruahman tawh china siamthat ngai nia langte pawh an sawiho nghal a ni.

Thenzawl Peace City lailia awm turin Greenfield City project proposal SASCI atanga thawh tura thehluh mek a ni a. He proposal hi pawm a nih chuan hma lak nghal mai theih a ni ang.

Meeting-ah hian UD & PA Minister Pu K. Sapdanga, Commissioner & Secretary to CM Pu Vanlaldina Fanai leh sorkar official dangte an tel a ni.

<><><>

SERCHHIP

Serchhip District-a tlawmngai pawl hrang hrang panga te telna, NGO Coordination Committee chuan Central sawrkar in India leh Myanmar ramri hung a tumna chu an thlawp thu an sawi.

Kan corr report lo ngaithla ang.

Serchhip District NGO Coordination Committee hian zirtawpni khan Serchhip Sub-Hqrs. YMA Hall-ah thutkhawmin India leh Myanmar ramri hung tum chungchang hi an sawiho a. Helai ramri hi Mizoram-a ruihhlo lo luhna lian tak a nih avangin an ram leh hnam hmalam hun thui tak ngaihtuahin Central sawrkar in ramri hung a tum chuan thlawp thu leh hung ngei se an tih thu an sawi a ni.

<><><>

V DAY

Hmangaihte puala hun hmanna Ni Valentines Day puala Mizoram chin than Valentine's Day thisen pek runpui chu vawiin hian Aizawl leh district khawpui dang thenkhatah huaihawt leh a ni dawn.

Valentine's Day puala thisen pek hi kum 2010 khan tan a ni a, kumin a vawi 17-na tur a ni. Mizoram pumah 2010-2025 chhung khan Valentine's Day pualin thisen unit 11,621 pek a ni.

Kumin 2026-a ValentinesDay puala thisen pek runpui huaihawtna pui ber chu Dawrpui Multipurpose Hall-ah neih a ni dawn a; ZMCH Blood Bank-ah leh district dang thenkhata district hospital-ah pawh huaihawt a ni ang.

Dawrpui Multipurpose Hall-a V-Day Blood Donation Camp-ah hian chawhma dar 10:30 atangin thisen pek hi tan a ni dawn a, Chawhnu dar 1-ah function tawitê hman a ni dawn a nga, MLA Jeje Lalpekhlua khuallian niin a hmanpui ang.

Nimin khan Valentine's Day pualin Govt Champhai College ah Blood Donation Camp neih a ni a, he hun hi Champhai SP Pu Lokeshwaran-R chuan a hmanpui a.

Pu Lokeshwaran-R chuan nunna hlu tak chhan nana thisen petute thiltih ropui tak avanga lawmthu sawiin, thisen pek hi mahni mihringpui te tana rawngbawlina

sang ber pakhat leh hmangaihna lantirna a ni a ti a. Thisen unit khat chauh hian damlote, accident tuar leh damdawi lam enkawl mekte tan nun thar a pe thei tih sawiin midangte nun chhanna turin thisen pek a pawihmawhzia midangte hnen a hrihhre zel turin zirlaite a chah a ni.

Valentine's Day puala thisen pekna hun hi Champhai District Hospital Blood Bank, Association for Voluntary Blood Donation (AVBD) buatsaih a ni a, Govt Champhai College Zirlai Mipa -61 leh hmeichhia - 19 ten thisen unit 80 mamawhtu apiangte hman turin an pe a ni.

<><><>

LUNGLEI

Lunglei District Bawrhsap bul tuma mipuite'n an kawtkaiyah ngei an mamawhna zawna sawrkar an dawr theihna hun, "I Kawtkaiyah Sawrkar" (Prashasan Gaon Ki Ore) chu nimin khan Bungmun RD Block chhunga Buarpui leh a chhehvel khaw mipuite tan Power & Electricity Mual, Buarpuiah buatsaih a ni.

Buarpuia "I Kawtkaiyah Sawrkar" hun buatsaihah hian department hrang hrang — Deputy Commissioner Office, Block Development Office, Health & Family Welfare, AH & Veterinary, Women & Child Development (ICDS), Agriculture, Horticulture, Public Health Engineering, Land Revenue & Settlement Department leh Mizoram Rural Bank te'n stall hawngin, awlsam zawka mipuite dawr theih turin an inpho chhuak a. Lehkha pawimawh hrang hrang (Aadhaar, Voter ID, ST/Residential Certificate, Job Card, Land Pass, etc.) siam thar/siam that te, bank account hawn thar leh bank hnuiaia sawrkar scheme hrang hranga inziah luh te, mihring leh ran inentir leh hri danna pek te, sawrkar ruahmanna hrang hrang chungchang inzirtirna leh inziah luhna te buatsaih a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

INTNL CONDOM DAY

Health Minister Pi Lalrinpuiin Mizoramah mahni kawppuite laka rinawm lo an tam chu HIV darh zel nachhan lian tak pakhat a ni a ti a, mahni kawppui lakah rinawm turin Zoram mipuite a chah

Nimina International Condom Day puala Mizoram State AIDS Control Society leh AIDS Healthcare Foundation India Cares te buatsaih Aizawl Dawrpui Multi-Purpose Hall-ah hun hmannah he thu hi a sawi a, Pi Lalrinpuii chuan Mizoram ah mipat hmeichhiatna atanga HIV kai an pung zel chu a ngaimawh thu leh hnam ang pawha mualphona a nih thu a sawi a,

World Health Organization (WHO) pawhin Condom chu HIV leh sex atanga inkaichhawn theih natna darh zel tur venna awlsam leh tangkai ber pakhat a nih thu a tarlan angin, Mizoramah pawh Condom chungchanga ngaihdan leh rinthu diklo awm thinte paihbo a, a hman dan tur leh a nihna ang taka Condom hi hman a ni se, HIV

leh mipat hmeichhياتna hman atanga inkaichhawn theih natna tam tak darh tur nasa taka a ven theih a beisei tlat thu a sawi a ni.

India ram HIV prevalence rate hi 0.2 ani a, Mizoram HIV prevalence rate erawh 2.74 a ni a, a zahthlak hle a ni a ti.

Kan corr report lo ngaithla ang.

International Condom Day hmannaah hian Pi Lalrinpuii chuan Love Brigade 2.0 Campaign a hawng a, Love Brigade 2.0 Campaign hnuaiah hian Two-Wheeler Taxi khalhtute hnenah Condom pai theihna tur Love Brigade Condom Jacket sem a ni a. Condom Jacket chu passenger leh a mamawh apiang ten Condom-an lak theihna atana tangkai taka hmang turin a chah a ni.

MSACS hotute chuan he Condom Jacket hi passenger leh a mamawh apiang ten Condom an lak theihna atana tangkai anih an beisei a, Mizorama HIV kai hmuhchhuah zinga zaa 70 vel hi mipat hmeichhياتna hman khaw loh atanga kai an ni a. Heng zinga a tam ber chu thalai kum 15 atanga kum 40 inkar an ni tih sawiin, HIV kai hmuh chhuah hi mi awm herh leh leplerh an ni kher lova, mi pangngai tak tak, khawtlang leh kohhranah pawh mi tangkai tak an ni fur tih an sawi a. Mipat hmeichhياتna hmang lo thei lote chu HIV bakah Sex atanga natna inkaichhawn theih dang laka an him theih nan Condom hman thin turin an chah a ni.

<><><>

PARLIAMENT

Parliament Budget session thawhkhatna chu nimin khan zawhfel a ni a. Session thawhhnihna hi thlaleh ni 9 ah an tan leh dawn a ni. Parliament session thawhkhatna hi thla hmasa ni 28 khan tan niin inkhawm tan niah President Droupadi Murmu-i chuan Parliament inhnih member thukhawm hmaah thu a sawi a ni. Nimin session thawhkhatna tawp niah Lok Sabha ah chuan Union Minister hrang hrang ten an ministry kaihnhawih lehkha pawimawh house dawhkanah an pharh a. Hemi hnu hian Presiding Officer Sandhya Ray chuan thlaleha thukhawm leh turin inkhawm a titawp a ni.

Rajya Sabha-ah chaun Zero hour leh Question Hour-ah Union Agriculture and Farmers' Welfare Minister Shivraj Singh Chouhan chuan zawhna chhangin Prime Minister Narendra Modia kaihhruaina hnuaiah loneitute harsatna tawh hrang hragn chingfel tura hmalak a ni a ti a. Loneitute thil tharchhuah tha taka vawn anih theih nan sawrkar chuan Agriculture Infrastructure Fund a siam thu a sawi a ni.

<><><>

SEVA TEERTH

Prime Minister Narendra Modia chuan a office thar Seva Teerth Complex, Delhi ami chu nizan khan a hawng. A office thar a luahluh hnua a thutlukna pawimawh tak tak siam nghalin PM RAHAT Scheme pawmpuina lehkha a ziak a. Hei bakah hian hmeichhiate sum leh paia chhawmdawlina niin Lakapati Didi vaibelchhe ruka tihpunna tur scheme-te, Agriculture Infrastructure Fund cheng vaibelchhe nuai 2 senna tur leh Startup India Fund 2.0 cheng vaibelchhe sing khat chuang senna turte a pawm a. Loneitute, hmeichhia, thalai leh khua leh tui dinhmun derthawng zawkte chhawmdawlina tur thutlukna pawimawh tak tak a siam a ni. PM RAHAT scheme hnuaiah hian chetsualna tuar hliam tuarte tan cheng nuai 1.5 thleng a thlawna enkawlina a dawn theih dawn a ni.

PM Modia chuan thusawiin ramin intodelhna kawng Viksit Bharat
a zawh mek tih sawiin tunhmaa mingo ten min awpna hnuaia rilru
puthmangte te paih a hun tawh a ni a ti.

<><><>